

Cussagl da cumün

Protocol nr. 9 da ls sezzüda dals 22 gün 2010

Immundizchas, fermativa Sainas

La fermativa ourasom la via da Sainas nu satisfà e periclitescha implü il trafic. Il Cussagl revgnischa sülla decisiun e decida da far üna fermativa per las duos gestiuns Ustaria Palafitta e Roman Erni SA. Il container ha da gnir piazzà sün lur terrain privat. Il lö precis han els da cumbinar tanter pêr. Il camiun va aint da la via da Sainas a svödar ils containers e tuorna inavo inoura fin pro la cruschada per cuntinuar la ruta inavant aint da Rontsch.

Ruesch Othmar, permiss d'ustaria

Il Cussagl conceda a sar Othmar Ruesch il permiss d'ustaria pel Hotel/Garni Munt Fallun. La taxa pel permiss vain fixada sün fr. 200.--.

Uorden dal provedimaint d'aua

Il reglamaint dal provedimaint d'aua actual es in vigur daspö l'on 1993. Per accumplir las pretaisas actualas sto'l gnir revais. Il respunsabel pel provedimaint d'aua preschainta la proposta chi's basescha sün ün muoster da „l'associaziun grischuna per il svilup dal territori“ (BVR). Il Cussagl propuona a la radunanza d'approvar la proposta. Las taxas annualas (taxa fundamentala e d'adöver) restan sco fin quà. Pro las taxas d'attach es gnüda augmentada la tariffa.

Institut otalpin, traget per „Downhill“

Dal 2006 esa gnü cumbinà a bocca tanter il silvicultur e'l respunsabel pel sport da l'Institut che toc dal god sur l'Institut chi po gnir dovrà sco traget pel „Downhill“. Il stadi actual nu correspuonda a l'idea da quella jada. Il schef da god, il guardgiachatscha e'l silvicultur han gnü üna visita oculara e propuonan da fixar da nouv il perimeter. Il Cussagl fa bun la proposta dal perimeter. In quel daschan gnir fabricadas alchünas schanzas però be cun laina da boscha secha. Id es d'interlaschar scha pussibel intervenziuns per megliorar la via da velos. Il mantun da rument (assas, filfier etc.) ha da gnir allontanà correctamaing e quai fin la mità da lügl.

Consorti Ouvra electrica Tasnan (COET)

Cun charta dals 3 gün 2010 orientescha la COET sur dal stadi actual dal proget da concessiun da l'ouvra electrica Tasnan. I sun entradas plüssas protestas cunter il proget per l'utilisaziun da la forza idraulica dal Tasnan. Id es gnü decis da far masüraziuns da l'aua amo tuot quist on. Cun quai as sperescha d'avair datas plü sgüras. Il termin pel cumanzamaint dal fabricat as sposta cun quai per almain ün on.

Parkegi Sainas

Il Cussagl decida da prolungar la saiv fin ourasom la piazza da parcar nouva in Sainas e da surtrar la piazza cun beton reciclà. Il Cussagl deliberescha il credit da fr. 13'200.-- per executar quistas lavuors. I'l büdschet dal 2009 d'eira previs üna somma da fr. 35'000.-- pel proget cumplet. I sun gnüts dovrats be raduond fr. 8'000.--. Pel 2010 nun esa gnü büdschetà nüglia (conto 623.501.02).

Il capo: sig. Reto Pedotti

L'actuar: sig. Andri Florineth

publichà als 05/07/2010